




FAAVAEINA 1839

O LE SULU SAMOA

ME 2019

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

## Fono Tele Malua 2019



**Susuga Tunumoso Soliola Iosia (FT),  
Ta'ita'ifono EFKS**



**Susuga Atapana Iosefa Uilelea (FT), Sui  
Ta'ita'ifono EFKS**



**Susuga Vavatau Taufao (FS), Failautusi Aoao  
EFKS**

I le palota mo le Laulau a le Fono Tele, ua see mai le sa Sui Ta'ita'ifono e avea ma Ta'ita'ifono le Susuga i le Toeaina ia Tunumoso Soliola Iosia (FT) mai le Matagaluega Falealili-Safata-Siumu, ae ua filifilia ai nei le Susuga i le Toeaina ia Atapana Iosefa Uilelea(FT) mai le Matagaluega Lotofaga- Lepa-Aleipata e fai ma Sui Ta'ita'ifono, ina ua malo i le palota na fai i le aso mulimuli o le Fono Tele, Aso Faraile 24 Me 2019.

A ua Penisione Malolo Manumalo

le susuga i le Toeaina ia Tautiaga Senara (FT) le sa avea ma Ta'ita'ifono a le Ekalesia Aoao i le 2018 - 2019.

E le'i oo i le tausaga e palotaina ai le tofiga o le Teutupe, lea oloo seei ai le Susuga Rev. Rimoni Wright (FS). Ao le palota mo le Failautusi Aoao a le Ekalesia, ua toe tofia ai le oloo iai nei, le Susuga ia Vavatau Taufao (FS).

O le Mau Autu o le Fono Tele 2019: "Faaaliga o le Mana o le Silisili'ese" ("Revealing the Power of the Most High")

Ua i'u ma le manuia le Fono Tele a le Ekalesia i lenei tausaga. Ua toe fo'i i fanua usuga fono, i le tapua'iga i aiga, aulotu, pulega ma matagaluega e fia a le Ekalesia. Sa sasaa le fafao i le tofa mamao ma le faautautaga loloto i le mamalu o sui usufono uma, i le sailiga o le mea e sili ona lelei mo le manuia o le Ekalesia ma ona tagata, e tusa ai ma le finagalo o le Matai Sili i le lagi. Soifua.

Saunia:  
Ofisa Sulu Samoa.

---

# O LE LAUGA

**Tusi Faitau:** Iosua 7:1 – 15

**Matua:** Iosua 7: 10, 11, 13

'Au'au: **“TOE SASA'A LE FAFAO”**

Ua fa'atonu mai le fa'amuāgagana ua fai nei ma 'au'au, 'toe sasa'a le fafao tusa lava po ua maea ona sasa'a muamua; e leai foi se tapula'a o le fa'afia ona toe sasa'a.' O lona uiga, ia sasa'a pea ma saga toe sasa'a pea le fafao i taimi uma ua tatau ma mana'omia ai.

O le fafao o se tama'i fagu po o se tama'i ato fo'i, sa masani tautai i aso ua mavae ona teu malu ai a latou pa fagota. Afai e ilo mai e le tautai sana pa e fa'aaogā i sona faiva mai lana fafao e aunoa ma le sasa'aina i lalo, o lona uiga e le o matua auililiina e le tautai lana sailiga, o lo'o faia lava mai pa ua ia masani lelei ma fiafia i ai. Ae afai e matua sasa'a uma i lalo lana fafao, o lona uiga ua matua fa'ato'aga lelei ma auilili le sailiga, auā o lea ua iloilo taitasi pa fagota uma e fili ai se pa e manatu le tautai o le a mau ai lona faiva.

O le fa'aaogāina la o le muagagana i aso nei, e fa'atatau i le tofa ma le fa'autautaga ia le aunoa ona toe fetu'una'i ma saga fetu'una'i pea, ina ia maua manū ma folau pea i le sololelei i se fa'amoemoe o lo o tuli mata'i. E matua manino lelei ma malamalama le molimau a le Tusi Paia i le 'a'ao fa'aloaloa o le

Atua, na fa'aolaina ai Isaraelu mai le pologa i Aikupito e avea ma nu'u sa'oloto i Kanana. Peita'i, e le i fa'amalosia Isaraelu ae sa i ai pea lo latou saolotoga e filifili ai pe latou te talia pe te'ena le finagalo o le Atua, mo lo latou lumana'i manuia. O le fa'apogai lea na le i faigofie ai le galuega fa'ta'ita'i a Mose, ma ia finau ai pea e toe sasa'a ma saga toe sasa'a pea le fafao i lona onosa'i, fa'apalepale, ma le alofa i le nu'u ina ia mautinoa e pale Isaraelu uma i le nu'u na folafolaina.

Ua mavae atu Mose ae tula'i mai Iosua e fa'aauau le galuega. O lea lava fo'i le finagalo o le Atua mo Iosua, 'Ia fa'aauau i lana ta'ita'iga le toe sasa'a pea ma saga toe sasa'a o le fafao, e pei ona sa ia vaai ma faalogo ai ia Mose. O lo'o manino mai i fuaiupu ua fai ma matua finagalo lea o le Atua, (f10)''...se ā le mea ua e faō ai fa'apea? (f.11) Ua agasala Isaraelu, ua tu'umavaega foi i latou i la'u feagaiga na ou fai atu ai...(f.13) Ina tula'i ia, ma fa'apaiaina le nu'u,...Isaraelu e, ua ia te oe le mea ua fa'atoina e te le mafaia ona tu i luma o e ita i a te oe se ia outou ave'esea ia te outou le mea ua fa'atoina.' O lea ua faō Iosua, atonu ua ia lagona le faa'tauva'a ma le tau fa'avai. Peita'i o lea ua fa'amalosiau le Atua ma faapea atu le agaga o ana fetalaiga, 'Toe sasa'a le fafao' ma saga toe sasa'a pea, 'aua le fiu

gofie a ia tula'i ma fa'amalosi i le galuega. Atonu po ua se'etia i le malu ole tai taeao Iosua ma Isaraelu i le mana fai vavega o le Atua na lavea'iina ai i latou mai le tele o faigata sa latou fa'afeagai, ae maise ai fo'i o lea fa'atoa tuanai atu le soloia o pa malolosi o le 'a'ai i Ieriko ma lo latou fa'atoilaloina e aunoa ma se tau tigaina o Isaraelu e fai se taua. Ai lava o lea ua manatu ai Isaraelu, e le toe tau sasa'aina se fafao auā o ai se isi o i sili pe afai o lea ua tau le Atua mo lona nu'u? Sa fesili Isaraelu i le Atua a'o latou sauni e tau ma Ieriko, peita'i, o lea ua le fesili ina ua sauni e tau ma si tama'i nu'u o Ai. Pe ona ua latou iloa o se nu'u to'aititi Ai ma le fasi gofie? Ai o lea ua latou tofia ai na o se vaega o la latou 'au tau e fa'atoilaloina Ai. Ioe! Ua manatu mama Isaraelu ma le manatua ai e toe sasa'a le fafao. Talofa e i le nu'u o le Atua ! ua fa'alumaina ma taumatagāina ina ua fa'asaga mai se tama'i nu'u na latou manatu mama i ai faasolomuli ma fafasi nisi o la latou au tau. O le taunu'uga lea o le le saili pea i le Atua. Pe ana latou saili i le Atua, e mautinoa lava e faailoa mai e le Atua le agasala a Akana ua afāina ai le nu'u; ona latou fai muamua lea o se taulaga mo le fa'amagaloga; ona latou o ai lea tusa lava pe toaititi a o lo'o o fa'atasi ma le mana fai vavega o le Atua e mafaia ai mea uma.

O le toe sasa'a o le fafao i le va feagai ai ma le Atua, tatou te fa'aaogaina ai lo tatou malosia, o

---

# O LE LAUGA

taleni, ma agava'a ua fa'asoa mai e le Atua, ina ua muamua ona tatou fa'atoga mo lana fesoasoani mai, ma tatou fa'atuatua i lona mana e mafai ai mea ua lē o' iai so tatou malosi ma se iloa; ae le o le toe lafoai o mea uma e fai e le Atua, a o a la a tatou mea a fai e tusa ma o tatou tofiga ua vala'auina ai i tatou? Atonu ua manino le feso'otaiga o le 'au'au ma le matua, faapea le vaega o le Tusi sa faitauina. A o le a se uiga mo i tatou ma o tatou tofiga ua vala'auina i ai tatou e le Atua?

O lo'o i' inā le tofā mamao ma le utaga loloto e maua ai le atoaga o le mataupu ua fa'amaite atu e le auauna vaivai. Ia tau ia o se pua e ula nai motugaafa ua fa'asoa atu, ae tatalo pea i le filemu o le Atua e aumai ai le mafanafana i o outou finagalo ma o tatou loto, tatou te talia ai ana afioga e a'oa'o mai mo i tatou uma. O le toe sasa'a o le fafao o se fuafuaga e tatau pea ona tatou fa'amalolosi e fai, auā ua televave le atina'eina o le atamai fa'a saienisi ma faiga fa'a tekonoosi, lea ua latou fa'a'ailoa mai tali o le tele o mea sa a'oa'o mai le Mataupu Silisili. 'O misitelio lilo na, na o le fa'atuatua i le Atua e mafai ona malamalama i ai.' I le toe sasa'a ai o le fafao, e mana'omia lo tatou o ese mai o tatou tulimanu mafanafana o manatu ma talitonuga o lo'o tatou fa'apupu'u ai, agai i se mea lautele e fa'a lautele ai la tatou vaai tusa lava po o tele ai ni fa'afitauli ma ni

tauviva o mafaufauga o fa'atali mai ai. Ia manatua foi o le toe sasa'a o le fafao e le mana'omia ai se toe taofiofi mamau i ni o tatou talitonuga tuai ma faapea ai, 'na pau lava mea sa'o ma le lelei o le olaga nei na o mea ua tatou iloa ma malamalama ai, a o mea ua manatu ai isi tagata ma latou iloa o mea sese na.' O le toe sasa'a o le fafao ma fai suiga ma fetu'unaiga i se mea e maua ai le to'afilemu ma le nofo lelei o tagata uma, o se fa'a'ailoga lena o loo tupu ma ola maloloina se tagata, se aiga, se nu'u, ma so'o se fa'alapotopotoga e aofia ai ma lana Ekalesia paia. Ina ua afio mai Keriso, sa feagai ma nisi o le fanau a le Atua o ē na latou faia lona finagalo e ala i le tausila lelei o le Tulafono na tu'uina mai ia Mose. E lei faailogaina atoatoa e Iesu si a latou foi fa'amamafa, a e pei o le agaga o le toe a'oa'o atu o Iesu ia i latou, se i toe sasa'a le fafao i le auga na fai ai le tulafono, po'o le fasioti po'o le fa'aola. Ina ua molia mai e taitai o le Lotu Iutaia le fafine ua latou maua ma fa'amaonia ua mulilua, ia Iesu mo sana faaiuga e tusa ma le tulafono a Mose, na tali Iesu i le auga po o le agaga o le tulafono, o le faaola a e le o le fasioti. O lea na Ia fetalai atu ai i le fafine, "Ou te le fa'asala foi ia te oe; alu ia oe, aua e te toe agasala" (Ioane 8: 1-11).

Ua tele tulafono ua ta'ita'iina ai i tatou ma a tatou feau. Tatou te le toe ta'ita'iina ai i tatou ma a tatou

feau. Tatou te le toe tigaina foi e tau sue ni tali o a tatou fa'aiuga fai, auā ua matua la tatou aganu'u, ua loa foi lo tatou malo ma ana tulafono ua mautu, e faapea foi i la tatou ekalesia ma lona fa'avae ae maise o ana iugafono ma tulafono tumau, ua maua uma ai tali o so o se fa'afesili poo ni fa'afitauli e tulai mai. Peitai, ia le aveavea lea ma ala tatou te fa'apea ane ai, o fea la a toe alalai atu ai ni toe sasa'a o le fafao, o lea ua malu tapui ma ua maea tau maea mea uma i le tofa sinasina ma le moe i le au matutua na mua i malae ma ua tofafa mai tia sa?' Ia manatua, o lo e soifua ma tatou ola i se lalolagi o suiga e tele, e le gata i le siosiomaga, a o le soifuaga i manatu ma talitonuga male fa'atuputeleina o le atamai ma le a'oa'oina; e tatau ai pea ona toe sasa'a le fafao, ina ia aua nei o tatou fonoina le masae o le ofu fou i se fasi ie tuai ae ia fonu pea i se fasi ie fou, e pei o le agaga o a'oa'oga a lo tatou Alii Faaola (Luka 5: 36-39) Ia manatua foi, e ui ina afio mai Iesu ua mautu tulafono ma a'oa'oga a Perofeta i le Feagaiga Tuai e ta'ita'iina ai le nu'u o le Atua, ae na Ia toe sasa'a lava le fafao ma toe faatulaga ai le tulafono ia le o se matai sauā e tu mai luma ma toso fa'aia a matau le tagata, a e ia tu'u le tulafono i totonu o le loto e fai ma tulafono o le loto fuatiaifo e lelei, ia faia ai mea uma i le loto malie ma le usita'i ma le alofa, ae le o le fefe ma le fa'amalie o le faaiga a tagata.

# O LE LAUGA

Ua tatou lagona uma le mamafa o fa'alogona eseese ua o'o mai, ona o le finauga ma le malo e uiga i le fa'alafogaina o Alofa o Faifeau. I la tatou vaai fa'a Mataupu Silisili, o se aga ua le tusa ona o Alofa, e lē fa'atulagaina e pei o totogi o isi galuega e faigofie ona fuafua le lafoga. Peita'i o Faifeau, o faigaluega a le Atua e tau e le Atua a latou auunaga ae le o ni totogi. O le isi foi manatu, o Alofa o lo'o lafo mai e tagata, e lafo ina ia ma'ea ona tipi ese le lafoga, ma e le talafeagai ona fai fa'alua se lafoga a se tagata. Ua tatou vaai foi i tua atu o le fa'alafoga o Alofa o Faifeau, e pei o lo'o fa'alafi mai ai se agaga o le fia pulepule tutū ma le sauā o le Malo, lea ua o'o lava i mea fa'alotoifale a le Ekalesia ua mana'o lava e o'o i ai lana pule. Ma ole ala lea ua tatou manatu ai e tataua ona fai se galuega e o'o atu ai se feau i lo tatou malo ina se'i toe sasa'a fo'i le fafao i la latou pito laau ma seu silasila, 'o se mea faigata tele i so'o se Samoa ona a'a i tui i lo la va nonofo ai ma le Atua; o lona uiga o le manatu, o le fa'alafogaina o Alofa o Faifeau, o se gaoiga ua tusa ma le a'a i tui. Ua tatou manatu ai foi i lenei finauga ma lo tatou Malo, toe lava o tatou lea o lo'o fai ma leo ole to'atele o le atunu'u o ē e le mafai ona lagona o latou leo ona o le tele o noanoataga latou te le mafai ona motusi ona o a'afiaga fa'ale tulaga o le soifuaga ae maise ai foi o faiga fa'apolokiki; ma o lea ua tatou fa'amalolosi ai pea e taofiofi le fa'atinoina o lenei tulafono i lafoga a Faifeau. Atonu e iai ma nisi mafua'aga lelei o lo'o fa'avae ai la tatou finau ae ua ou le maua.

Ae i la tatou foi faalogo atu i le Malo, tatou te le pogisa foi ia latou mafua'aga o lo'o finau mai ai. Fai mai latou o le lafoga, o se auala fa'a-kerisiano lea e mafai ai e le tagata ua tele lona tamaoiga ona fesoasoani atu i nai tagata matitiva; ma o le lafoga a le tagata ua tele ana mea e fa'asoaso e le Malo e atia'e ai auala mo femalagaiga, le eletise e fa'agaioi ai mea uma mo le sololelei o le ola o le tagata, faapea le suavai taumafa o le ola i le tino mo tagata uma, atoa ai ma isi auunaga uma mo le manuia lautele o le atunu'u ma fanau mo le lumanai. O le isi foi mau a le Malo o tagata nu'u uma o so'o se atunu'u e aofia ai fa'alapotopotoga uma ma Ekalesia, e ta'ita'iina uma i tulafono a faigamalo a atunu'u o lo'o latou nonofo ma atia'e ai. Ioe; e tau fai loloto uma ma tāua mau a le malo fa'apea foi ma ā tatou mafua'aga i le finauga o lo'o fai nei. E ui la ua i lima nei o le tulafono le mataupu, e le aveava lava lea ma ala tatou te fa'apea ifo ai, ua le toe nanea se toe sasa'a o le fafao.' O taimi aupito sili ia ona mo'omia ai le toe sasa'a o le fafao, o taimi o le vevesi ma ua fa'auluulumamau lagona o le loto maulalo ma le fa'amagalalo atu, ina ua fa'auliulito le loto tigā ma lagona saili malo. A'o tatou i ai pea i lenei vaitau o le toe soifua manumalo o lo tatou Alii Fa'aola mai le Oti ma le tu'ugamau, ae tualuga i le afio ifo o le Agaga Paia e pei ona tauaofia ai le fonon Tele i lona laumua ina ia fa'atumuina i le mana o lona Agaga, o le tatalo foi lea ma le fa'amanatu a le Sulu i lenei masina, tatou toe sasa'a le fafao e tusa ma le uiga o le Toe Tu ae

maise le afio ifo o le Agaga Paia na te aumai le malosi fou tatou te mafai ai ona fai fa'aiuga e le faigofie ona tatou faia pe a na o ia tatou lava. O le toe sasa'a o le fafao o le toe fetu'unai o le tofa ma le fa'autaga ina ia maua le filemu ma le nofo lelei. Ia fefinauui lagona o lo tatou Alii Faaola i ona aiā tataua fa'a tagata soifua ina ua amata fa'amalumalu mai ona puapuaga; i le toe sasa'aina o lana fafao i le finagalo o lona tamā oi le lagi mo le fa'aolataga mo tagata uma, atoa ma ona foi fa'alogona ma ana aia tataua, na ia fetalai ai fa'apea, "Lou Tamā e, a e finagalo i ai, ia e ave ese lenei ipu ia te a'u; a e aua le faia lou loto, a o lou finagalo"

Tatou toe sasa'a ia le fafao fa'apei ona a'oa'o mailo tatou Alii Faaola. 'Aua le faia le mea ua tatou manatu e sa'o ma tatou manuia ai, ae tatou vaai lautele i le Atua ma lona finagalo alofa mo Samoa uma; o lona suafa ua fa'avae ai lo tatou Malo, na saili i le lotonu'u fa'amaoni o ni o outou tua'a ma ni o matou matua. O lo o soifua le Atua e malu ai lana Ekalesia, e malu ai foi ma si o tatou malo tau atia'e. Amene.

**Saunia:**

**Esera A. Esera (FS)**

**EFKS Sapapalii**

**Matagaluega Fa'asaleleaga.**

## John 14: 6

**Jesus answered, "I am the way and the truth and the life. No one comes to the Father except through me"**

---

# O I LATOU UA PENISIONE MALOLO

## MANUMALO

O le aso Lulu, aso 22 Me 2019, na faia ai le sauniga faapitoa mo faafeagaiga ma toeaia ua penisione malolo manumalo, poo i latou ua maea le latou tautua i le talaiina o le finagalo o le Atua i nuu ma ekalesia sa galulue ai. O le Susuga i le toeaia ia Tunumoso Soliola Iosia (FT) sa ta'ita'iina lea sauniga i le malumalu Iupeli i Malua. Sa faatumulia lea sauniga i aiga, uo, ma e masani o i latou ua Penisione.

E to'a 11 i latou ua fa'ai'uina la latou tautua e ala i le Penisione Malolo Manumalo.

### **1. Faitamai Leota (FS) & Lupeulufua Leota**

EFKS Mauga o Siona  
Pulega i Saute  
Matagaluega Amerika

### **2. Litala Tuimauluga (FS) & Levei Tuimauluga**

EFKS Moorebank Prestons  
Pulega Sini i Sasa'e  
Matagaluega Niusauelese

### **3. Vaimoso Apineru (FS) & Filiata Apineru**

EFKS Hasting  
Pulega Ueligitone i Matu  
Matagaluega Niu Sila i Saute

### **4. Tanielu Mamea (FT) & Feu Mamea**

EFKS Otara  
Pulega Manukau i Sisifo  
Matagaluega Manukau

### **5. Lucky R. Slade (FT) & Terri Slade**

EFKS Te Atatu  
Pulega Waitakere  
Matagaluega Aukilani

### **6. Utufua Naseri (FT) & Taiaopo Naseri**

EFKS Apia  
Pulega Apia Sisifo  
Matagaluega Apia

### **7. Senara Tautiaga S. (FT) & Olita Senara**

EFKS Matautu  
Pulega Falelatai ma Samatau  
Matagaluega Aana

### **8. Poka Maua (FT) & Malo Maua**

EFKS Savaia tai  
Pulega Lefaga  
Matagaluega Aana

### **9. Kaleve Simona Leifi (FT) & Tausunu Leifi**

EFKS Saipipi  
Pulega Amoa  
Matagaluega Faasaleleaga

### **10. Laneselota Opetai (FS) & Mere Opetai**

EFKS Fagafau  
Pulega Salega  
Matagaluega Faasaleleaga

### **11. Sileli Tauaifaiga (FS) & Mere Tauaifaiga**

EFKS Fagamalo  
Pulega Gaga'emauga  
Matagaluega Ituotane

---

## FAAMUAMUA LE ALOFA I LŌ

### LE MANUMALO

O le tala a se tasi o motu o le pasefika i le faiga ma le aogā o le la fala e folau ai va'a i le vasa. O fala e lalaga i le laufala ona fai lea o le faiga fa'aaoga ai e fai ma la ole va'a e folau ai i isi motu.

Sauni le tu'uga va'a alo foe a se au uso e to'atolu tama matua lona lua ma le itiiti. Amata le tu'uga mai le pito o le motu e alu le tu'uga, ae tauvalaau mai le tinā o tama nei e to'atolu i le isi itu o le motu valaau mai lau tamā e, ta fia tietie atu. Sau le tama matua valaau le lo'omatua ta fia tietie ae alu lava, sau le tama lona lua valaau le lo'omatua

faapena foi o loo naunau i le fia malo.

Leai se isi o tama matutua na afe e ave le lo'omatua. Sau loa le va'a o le tama laitiiti valaau le lo'omatua ta fia tietie atu afe loa iai le tama i lona tinā, e alu atu ae fai iai le lo'omatua, na ou valaau atu ia te outou e afe mai ou te avatu lau meaalofo lea e aogā ma fesoasoani i le tu'uga o le la fala, e faapipii i luga o lou va'a ma ave ai e le matagi ae na ona e uli fa'atonutonu i mea agai iai ona faapipii loa lea e le tama laitiiti le la oso ma le lo'omatua, alu loa le

vaa e pei e lele ave e le matagi ona o le la, alu atu lava le va'a o le laitiiti mua ae lava e tau alo mai va'a o le au matutua ona fa'aeaina loa lea o le tama laitiiti e fai ma matai o le latou aiga ina ua manumalo i le tu'uga.

Talu ai ua le sili ia te ia le mua po'o le manumalo ae ua alofa i lona tinā fia tietie ae ua maua ai ma le mealofa sili ua lelei mo ia ma fa'aeaina ai.

Ia sili ia te oe le alofa i ou matua. Lou aiga ma oe taatia fautuaga ma apoapoaiga e te manuia ma fa'aeaina ai lou tagata.

Tusia:

**Rev. Solomon Tuatagaloa**  
**Toeaina Penisione Malolo**

---

# **“FETU’U TU’UNAI MUNIAO”**

---

**Kenese 24: 31** “... Maliu mai ia o oe ua fa’amanuia e le Ali’i; se ā le mea ua e tu ai i fafo?...”

O upu ia a Lapana na fai ia Elisara le auauna pule a Aperamo, ina ua taunu’u lana savali i Mesopotamia, i le aiga o Aperamo. “...Maliu mai ia o oe ua fa’amanuia e le Ali’i; se ā le mea ua e tu ai i fafo?...” Ma e foliga mai i upu, ose tagata o lo’o tauanau mai i totonu. E foliga ose auauna ua fa’amanuiaina lona taumafai, ae o lo’o tu lava i fafo. O se tagata sa galue ma le fa’amaoni, lea ua tau lau o lona taumafai, ae e le o fia ulufale i totonu, o lo’o fia tu pea i le tulaga ole auauna.

Manatua, ole tala lea ia Elisara le auauna pule a Aperamo, lea na alu i Mesopotamia, i le aiga o Aperamo, e su’e mai se avā a Isa’ako. O le va o Kanana ma Mesopotamia e tusa ma le 450 maila le mamao. O lona uiga ele faigofie ituaiga feau fa’apenei, e le so’ona auina iai ni tagata ele fa’atuatuaaina, e na’o auauna e galulue fa’amaoni. Auauna e mafai ona tu’u o latou ola i ō latou lima, ae fa’atino le feau ina ia malie le Matai. Manatua ole auala e le gata ina mamao ma gaoā, ma tele fa’afitauli, ae mautinoa fo’i e lamatia le ola i tagata faomea ole ala. Peita’i a faitau manino i le tala, e le’i fa’afiti le auauna o Elisara, i le la feagaiga ma Aperamo lona matai. O upu o le feagaiga; **E le**

ose fafine Kanana... a’o lounu’u ma lona aiga, e te aumaia ai se ava ma lo’u atali’i o Isa’ako... Lea la e ui ina mamao ae le’i solomuli ai lenei auauna fa’amaoni.

**Manatua foi o le tagata lea, na manatu Aperamo ole a fai ma suli o lona aiga, pe afai e leai sona atali’i, (taimi lea e le’i fanau Isa’ako). Tasi lea o pine e iloa ai le ituaiga tautua na fai e Elisara mo le aiga o Aperamo. Auā e lei nofonofotofia e Aperamo e fai ma pule i ana auauna uma, ole ata ole auauna na “galue fa’amaoni. Lea fo’i ina ua taunu’u le malaga ma fa’aulufale, ma laulau mai le mea’ai, ae fai mai lana tali; “O te le ‘ai lava, a sei’a uma ona tau atu o lau feau.” Oka se auauna ina a fa’amaoni, se auauna ina a alofa i lona matai. Ua galo le vaivai ma le fia ‘ai, ae fa’amuamua le feau ...**

· E pei o le agaga le o upu a Lapana; **“Maliu mai ia o oe ua fa’amanuia e le Ali’i; sea le mea ua e tu ai i fafo”** O lona uiga so’o se auauna e galue ma le fa’amaoni, se auauna e galue lelei, ma ua fa’amanuia ele matai ele tatau ona tutu i fafo, auā ele fetau fafo mo se auauna fa’amaoni. Manatua le fa’ataoto ale Ali’i i auauna e to’atolu ma taleni na tu’u iai, Lima, Lua, ma le Tasi. O le saunoaga a le Ali’i; **“Le auauna lelei e, ma le fa’amaoni... ulufale maia i le**

**fiafia o lou Ali’i”** Silasila, e tauanau mai oe ele Ali’i, e tala atu ou a’ao i totonu, ete fiu ete fia tu i fafo, e le mafai, leaga ele feauga fafo mo se tagata sa galue lelei, ma galue fa’amaoni. O fafo lava ia i le pouliuli e fetau ma le auauna leaga ma le lē fa’amaoni. Le auauna e leai se mea o faia, ae fa’amoemoe i ana upu molemole e lafi ai. Fai mai le matai; **“Fao le taleni sa ia te ia, ae tuli i fafo i le mea o iai le taufaitagiauē ma le liliu o nifo...”**

· E ese le manaia ole tau ole auauna fa’amaoni, ae ‘aua fo’i nei galo ia i tatou le o’ona ole tau ole auauna paie ma le le fa’amaoni. **E le gata** ina fao le mea sa ia te ia, ae toe tuli i fafo i le pouliuli. E tofu uma lava i tatou ma faiva, o nafa, ma tiute eseese ua vala’auina iai i tatou e le Matai, i aiga, o faigānu’u, o le Malo, o kamupani eseese, aemaise o le Galuega a le Atua. E tasi a le fa’amoemoe o le Matai, ia tatou galulue ma le fa’amaoni. O le upu moni e le mafai ona fa’afitia, oi tatou lava ua na oni auauna augavale ma le lē atoatoa, e iai taimi tatou te vaivai ma fa’aletonu ai, e iai taimi e manumalo ai le fili i o tatou loto, ma tatou to’ilalo ai. Peita’i, ua aumai e Keriso le fa’ata’ita’iga, o le **‘Ola Tatalo’** auā ole mana lea sa fa’atino ai le Galuega Fa’aola. A faitau manino fo’i ile fa’atinoga ole feau a Elisara, ele itiiti ile fa’atolu ona tatalo le auauna i le Atua, ia alofa ma fa’amanuia lana galuega mo lona matai.

· Na ona toe fa’amanatu lava le saunoaga ale Ali’i; **“Le auauna lelei e...”** E le o fa’apea mai; Lau Afioga i le ali’i Palemia... po’o Lau Afioga i le Ali’i Minisita... Leai; E le o fa’apea mai foi; Lau susuga i le Toeaina, Lau susuga i le fa’afeagaiga, po’o Lau afioga i le

Tiakono po’o le a’oa’o po’o lea lava... Leai; “**Le auauna lelei e, ma le fa’amaoni...**” O lona uiga e tasi lava lo tatou fa’alupega i luma o le Matai, oi tatou uma lava o auauna. Pau le mea tatou te eseese ai, o tatou tulaga tofi, ma tiute e fai. Po’o lea le tofi o e galue ai, maualuga pe maualalo, mamalu pe le taualoga, tele le tofogi pe

taufua’asoa, o le mea taua i le finagalo o le Matai, o lou galue ma le fa’amaoni, e fai le mea e gata ai lou mafai, o le mea o totoe, lafo atu ia te Ia.

**Rev Keneti Leaupepetele .T. (F.S.)**  
**EFKS Savaia & Tafagamanu-Uta**

Toe tago i le fasi pepa lona lua, ua na o le tilotilo iai a ua le faitauina foi, ae ua amata ona maligi ona loimata. Ua toe tilotilo i le fasipepa lona 3 ua le mafai ona faitau auā ua tagi moi a le fafine.

O e mateia mai le mafua’aga o le maligi o loimata o le tinā lenei. Na matua sasa’a mai lona ita i le leaga o lona to’alua ma ia tu’ua’ia i le la misa so’o. Ae na tali e le tamaloa i le upu filemu. Fai mai le Poto o Solomona...”O le tali filemu e liliueseina ai le ita a’o le upu fa’atiga e tupu ai le ita...” Oka se lototele o lenei tamā e tali le ma’ema’ea o lona to’alua, i se auala maualalo ma le filemu. Aemaise o fasipepa e tolu ma upu na ia tusia ai.

# **“FETU’U TU’UNAI MUNIAO”**

## **Tala mo Ulugalii Talavou**

E iai le ulugalii talavou e tau le misi se vaiaso e misa ai. E amata na talanoa po lea se meaai a tamaiti o le afiafi ae uma ane ua vaovao fusuaga ao matamata iai le fanau. E taufeololo si tamāloa ao le fafine sole o le aitu le mea; e nofo ma tu’ua’i o lona to’alua lea e mafua ai ona la misi so’o.

Fai atu loa le tamāloa. Vaai tago e tusi mai ni au fasipepa se tolu, e ta’u mai ai au mafua’aga lea e te tu’ua’ia ai a’u i lō ta misa so’o, lea foi o le a tusi a’u fasipepa se tolu. A uma loa toanai o le Aso Sa, ona lau lea ae fa’amasino le ta fanau po’o ai e sao. Fai mai le fafine, “manaia le tonu lena.”

Uma loa toanai o le Aso Sa fai atu loa le tamāloa i lona to’alua. Ia tago laia e lau mai ta fasi pepa, ae muamua lau mai au mafuaaga. O le taimi lea ua matua fa’ama’ati le pupula a le fafine ma fai mai mea muamua....

1. E ā la ona ta misa so’o, o le tuai ona e sau i le fale aemaise lava aso o le tofogi, e te sau toetiiti ao.

2. E ā la ona ta misa so’o, o lou le iloa fai le fa’asoa i tupe, e uma ona e inu pia ai ma e tafao solo ai, ae fia aai lau fanau lele. Ma le isi mea, faakoa ou kau lea i se kamaloa ua faikakala sole.

3. E ā la ona ta misa so’o. O lou le fa’amaoni i le ta tautoga, na fai i luma o le Atua. Fa’apea oe oute leilola au teine ia e fai, tele ina e le sau i isi po... fai mai le fafine. Tele isi mafuaaga, ae ua lava lea e iloa ai ele ta fanau. O oe le mafuaaga.

E uma atu tala ia a le fafine, a ua to’otuli le tamāloa ma punou ua le tautala. Na ona ea lava i luga fai ma lana tala ma si ona leo e tau le lagona “Mom I’m Sorry” ae fa’amolemole tago e lau mai au fasipepa lena na tusi atu” Tago loa le fafine i le fasi pepa muamua na o le tilotilo iai a ua le faitauina.

1. Mom, e sao a oe i mea uma...
2. Mom, Im very Sorry...
3. Mom, Pls forgive me.

Silasila i le auala na fai e lenei tamā na matua liliu ai le loto o lona to’alua ma o le tala faimai. O le aso lava lea na toe faalelei ai lenei aiga, e lei toe misa lava. Ua le gata ina fealofani le tamā ma le tinā; a o le fanau foi ua ola fiafia ma fealofani.

Amuia se aiga ae fa’amaite mai e matua; le filemu male ola fealofani; ae fanau mai i le loto fa’amaulalo, e iloa ona fa’atoese. Fai mai le isi toeaina. “O lalo lava e maua ai malo” E mafai foi ona liliu fa’apea. “Dad, Im very sorry” Fai atu ai foi...

### **Tusia:**

Keneti Leaupepetele (FS)  
EFKS Savaia & Tafagamanu-uta

\*\*\*\*\*

---

# **PEPA FONOTELE MALUA 2019**

## **“O LE ATUA MA MALO FAALELALOLAGI O I LE MATAUPU E FITU O LE TUSI O TANIELU”**

### **Upu Faafeiloai:**

E muamua lava ona faatalofa ma faatulou atu i le pa'ia ma le mamalu o lenei Fonotele. I le paia o le laulau a fonotele, lau afioga i le Taitaifono faapea le Sui Taitaifono, le susuga i le Failautusi Aoa faapea le Teutupe. Le pa'ia o le itufale o Tamā o le Ekalesia, susuga i Toea'iina faapea le mamalu i Tamā Penisione, le mamalu o le nofo a Komiti, susuga i faafeagaiga faapea le pa'ia ma le mamalu eseese o sui usufono mai Matagaluga e fia o le Ekalesia i Samoa nei ma atunuu e mamao. Faamalo le soifua maua ma le lagi e mama!

### **Faatomuaga:**

O le autu o lenei pepa e faapea: “O le Atua ma Malo Faalelalolagi o i le Mataupu e Fitu o le Tusi o Tanielu.” E tusa ai ma le molimau a le Tusi Pa'ia, e faaogaina e le Atua malo faalelalolagi e aofia ai ma Israelu lona nuu filifilia, e faaaliga ai lona mana ma lona silisili'ese. O le manatu foi lea o loo taumolimoli mai i le mataupu e fitu o le tusi o Tanielu lea e faaautu i ai lenei suesuega. O le tala i le “*Faaliga o le mana o le Silisili'ese*” e tauala mai i le faaaliga na vaaia e Tanielu i lana miti a o ta'oto i lona moega i le

po. O le miti e uiga i le tula'i mai ma le faatoilaloina o manu feai e fa e fotua'i mai i le sami tele ma faaleaga i le 'au faatuatua, ona taualuga lea i le faatuina e le Atua o le malo o le 'au faatuatua.

E tusa ai ma le faamatalaina o le miti a Tanielu, o nei manu tetele e fa, o tupu ma o latou malo o le a tutu mai i le lalolagi (V.17). O le faauigaina masani lava o le faaaliga na vaaia e Tanielu o le faatoilaloina lea e le Atua o malo faalelalolagi na faaleagaina le 'au faatuatua ma toe faatuina ai le malo o le 'au faatuatua i le lalolagi nei. I lea vaaiga, o malo faalelalolagi o malo a le tiapolo o loo taumafai pea e faaleaga le malo o le Atua. A e a tatou faitau toto'a i le mataupu leni e fitu o le Tusi o Tanielu, e i ai lava nai vala o loo au mai ai se ata o nei manu poo malo faalelalolagi na faatuina mai ma o loo faatonutonuina e le Atua. O le manulauti foi lea o tusitusiga ia faaapokalupisa e i ai le tusi o Tanielu. O le taumafaiga ina ia tulei mai le mataupu silisili, o loo faatonutonuina e le Atua le talafaasolopito ma le gasologa o mea uma o le lalolagi. E aofia ai ma le tula'i mai ma le toe mou atu o faigamalo.

Peita'i e le o se lagona na tupu fua pe patino na o tusitusiga faaapokalupisa, a o se mataupu silisili o loo atagia i le Feagaiga Tuai atoa lava. Amata mai lava i le amataga na faaogaina ai e le Atua malo faalelalolagi e aofia ai ma Israelu lona nuu filifilia mo lona faamoemoe. Mo le faapupulaina atili la o lea manatu, o le a aga'i muamua ai e sailiili le faaogaina e le Atua o malo faalelalolagi i le Feagaiga Tuai. E aoga foi e fai ma faamalama, e faaogaina mulimuli ane faitau ai le mataupu e fitu o Tanielu, ma faapupula atili ai le feso'otaiga a le Atua ma manu feai poo malo faalelalolagi o i ai.

<sup>1</sup>O tusitusiga faaapokalupisa e aofia ai le tusi o Tanielu i le Feagaiga Tuai ma le tusi i le Feagaiga Fou.

### **O le Atua ma Malo Faalelalolagi i le Feagaiga Tuai:**

E tele auala na faaogaina ai e le Atua malo faalelalolagi e aofia ai ma Israelu o i le Feagaiga Tuai. O lea ua manatu ai e autala le Feagaiga Tuai ma faailoa nisi o auala na faaogaina ai e le Atua malo faalelalolagi. E le o le faamoemoe ia faailoa uma auala na faaogaina ai e le Atua malo faalelalolagi, auā e le lava le



---

# **PEPA FONO TELE MALUA**

## **2019**

### **“O LE ATUA MA MALO FAALELALOLAGI O I LE MATAUPU E FITU O LE TUSI O TANIELU”**

avanoa e faailoa uma ai, a e tau lava ina ilo mai nisi o auala e fai ma faata'ita'iga.

#### ***i. Galuega Foafoa***

E tusa ai ma le molimau a le Feagaiga Tuai, na faaaogaina e le Atua malo faalelalolagi e faataunuu ma faaalua ai ana galuega i le foafoaina o le lalolagi. Manino lea mea pe a tatou vaavaai i le malo na tau amatamata i Senara poo Papelu mulimuli ane (Kenese 11:1-9). O lea malo na faaaogaina e le Atua mo le foafoaina o gagana eseese faapea le faatagataina o le lalolagi e ala lea i le faataapeapeina o tagata ma soloia ai lea malo.

#### ***ii. Faamasinoga***

Na faaaogaina foi e le Atua malo faalelalolagi e faaalua ai lana faamasinoga tonu. O le faata'ita'iga o lea mau o loo maua i le tala i le faatamaiaina o Sotoma ma Komoro ona ua matua tele lava a latou agasala ua aofia ai tagatanuu uma o nei malo (Kenese 18 – 19). O le isi faata'ita'iga o i le Numera 15: 39-45 lea na faaaogaina ai e le Atua Amaleka ma Sa Kanana e fasia Isaraelu i le taua i Horema ona o a latou agasala. E faapea foi le faaaogaina e le Atua o malo o sa Kanana i le vaitau o Faamasino. A agasala le nuu ona faatulai lea e le Atua o le malo e faataunuuina lana faamasinoga mo ona tagata ona o a latou agasala. E tusa ai foi ma le mau a le perofeta o Ieremia, na

faaaogaina e le Atua le malo o Asuria ma Papelonia e faatamaia Isaraelu ona o a latou amioletonu.

#### ***iii. Galuega Faaola***

E faaaogaina foi e le Atua malo faalelalolagi mo lana galuega faaola. Manino lea manatu pe a tatou vaavaai i le faaaogaina e le Atua o malo o Metai ma Peresia e tauala mai ai lana faaolataga mo lona nuu na nofosala i faiga a le malo o Papelonia (Isaia 13: 17-19 & Ieremia 51:11-58). O la a le perofeta o Ieremia, ua faaosoina e le Alii loto o Metai e faataunuuina lana faamasinoga ia Papelonia ona o a latou faiga faa-le-alofa i lona nuu.

#### ***iv. Faaalia ai lona Alofa***

O le isi auala na faaaogaina ai foi e le Atua malo faalelalolagi, ina ia faaalua ai lona alofa. E faapei la ona manino i le tala i le perofeta o Iona. Na faatonuina e le Atua Iona ina ia alu i Nineva e folafola i ai le malaia o le a oo mai pe a le salamo mai o latou ala amioletonu. O le faailoga o le alofa le faatuaioia o le Atua, ina ia faasaoina mai le malo mai le malaia. Fetalai le Atua ia Iona, “O a'u foi ou te le alofa ea i Nineva le aai tele...”

#### ***v. Faaalia ai lona mana silisiliese***

Na faaaogaina foi e le Atua malo faalelalolagi e faalia ai lona mana silisili'ese. Manino lava lea tulaga pe a tatou manatunatu i le va feagai

ai o le Atua ma Isaraelu lona nuu filifilia. Atatou tagatagai i le talaaga o le malo o Isaraelu, e maoa'e ma tetele vavega na faia e le Atua mo lona nuu. O nei vavega ua faaalitino ai le mana o le silisili'ese i le va ma isi malo aemaise le va ma atua faapaupau. O le faata'ita'iga mo lenei mau e maua mai tala o le faasa'olotoina mai e le Atua o Isaraelu o i le Tusi o Esoto. Na faamaaaina e le Atua le loto o Farao ma faateleina faaailoga ma vavega i le nuu o Aikupito, e faailoa ai lona mana ma lona silisiliese. E le gata i le va ma Aikupito a e faapea foi ma le va ma ona atua faapaupau.

#### **O le Atua ma Malo Faalelalolagi (Manu Feai) o i le Tanielu e Fitu:**

Faapei ona taua i luga, o manu feai poo malo faalelalolagi o loo taua i le mataupu e fitu o le tusi o Tanielu, e afua mai le Atua ma oloo faatonutonuina foi e le Atua. O pine nei e lagolagoina ai lea manatu:

**1.** “O matagi e fa mai le lagi ua pesi tetele atu i le sami tele. Ona o ae ai lea mai le sami o manu fe'ai...” (ff, 2-3) O lenei vaaiga o loo atagia ai le tulaga o le foafoaga i le amataga. I le taimi na ufitia ai mea uma i le sami tele ma le Agaga o le Atua na fegaoioia'i ai i le fogatai. Manino lea mau pe a tagai i le upu

Aramaika lea o le רַחֵם

(Ruwach). O lea upu o loo faaliliuina i le Tusi Paia Samoa o le matagi a e mafai foi ona faauigaina o le Agaga poo le manava ola. E faatatau i le Agaga poo le manava ola mai le Atua na pogai ai le ola o mea uma o le foafoaga. O loo atagia foi i le

(faaauau itulau 10)

# PEPA FONO TELE MALUA

2019

## “O LE ATUA MA MALO FAALELALOLAGI O I LE MATAUPU E FITU O LE TUSI O TANIELU”

fuaiupu o matagi e mai le lagi. E uiga lasi foi le upu Aramaika lea o le שמײן (Shemayin), e le gata e faatatau i le vanimonimo ma mea o ai, a e faapea foi ona faatatau i le nofoaga e afio ai le Atua ma agelu. O lona uiga e mafai foi ona faapea o Agaga poo le manava ola mai le mea e afio ai le Atua na pesi atu i le sami ona o a'e ai lea o manu feai e fa. E tusa ai foi ma le molimau a le Kenese 1:21, o manu feai o isi ia galuega foafoa a le Atua. Pe mafai foi ona faapea o manu feai poo malo faalelalolagi na tulai mai, o le faaaliga lava lea o galuega foafoa a le Atua. Ia aemaise o lona mana ma lona silisili'ese, ina ua faagaoioi e lona mana mea o le foafoaga e aofia ai ma manu feai poo malo faalelalolagi.

2. “*sa faatuina i ona vae, pei se tagata, ma ua foa'iina atu i ai le loto o le tagata.*” (F.4) E le o taua manino mai i lenei faitau aemaise le mata'upu e fitu o le Tusi o Tanielu, poo ai tonu lea e faia le faatinoga lea o le fatuina o le manu i ona vae e pei se tagata, ma foaiina atu i ai le loto o le tagata, o le le ta'uaina o le o loo faia le faatinoga, o le isi lea metotia faatusitala e pue atu ai le tagata faitau ina ia auai atu lona mafaufau i le faamatalaina o le tala. O le avanoa mo le tagata faitau na te faatumuina ai le vala lea mai lona faitauina o le tala. E tusa ai la ma lau faitau i le tala, e mafai ona

faapea o le o loo faia le faatinoga i le uluai manu feai faapei ona taua, o le Atua lava. E ui lava e le o taua le Suafa o le Atua i le mataupu lenei e fitu o le tusi o Tanielu. A o loo faalupe le Atua e faaogaina ai nisi o suafa ua na o le Alii e faasino i ai. E faapei la o faaupuga

Aramaika ia o le עתיק יומן ('atiq yomin) ua faa Samoa i le Tusi Paia o le “Le ua mai anamua ona aso” (f.9) ma le עליזן

('elyon) faaliliuina i le Tusi Paia Samoa o le “Silisili'ese” (18, 12, 25 & 27). O loo manino lava i le tala, o le mai anamua ona aso poo le Silisili'ese, o loo faia faatinoga ia o le tuuina atu ma le tuuina ese o mea mai manu feai. Ua toe atagia ai foi i ia faatinoga le faaogaina e le Atua o malo faalelalolagi e faaaliga ai ana galuega foafoa ma lona mana silisiliese.

3. “*ua latou fai atu ina Tulai ia, ina e 'ai tino e tele*” (f.5). O lenei faatonuga o loo au mai i le numera tele ma e le o manino foi poo ai latou ia na faatonuina le manu feai lona lua e Tulai ma 'ai tino e tele. A o loo atagia i lenei faatonuga, faatonuga pulurale o i le Kenese 1:26 faapei ona fetalai ai le Atua “*Ina tatou faia ia o le tagata i lo tatou faatusa*” faapea le faatonuga a le Atua o i le Kenese 11:6 “*O mai ia, ina tatou o ifo ia mai ia tatou faaeseeseina i lea mea a latou gagana.*” Ia e tele lava se finauga

poo ai tonu lea e faasino i ai le numera tele o loo faia ia faatonuga. A o le mau faa-Eperu, o nei faatonuga o loo atagia ai le i ai o se saofa'iga a atua. O lona uiga o lea e faatonu e le Atua silisiliese atua o le saofa'iga ina ia faataunuu ana fuafuaga mo le foafoaga. O le saofa'iga foi lea o loo atagia i le vaega mulimuli o le miti a Tanielu (v.9-10) i le faatulagaina lea o nofoalii ma nofoia le faamasinoga e faamasinoina manu feai. O loo atagia ai foi i inei le faaogaina o nei manu feau poo malo faalelalolagi e faataunuuina ma faaaliga le faamasinoga a le Atua.

4. “*o le tasi pei o le nameri...ua tuuina atu i ai le pule*” (f.6). O loo atagia foi i ia upu galuega foafoa a le Atua e pei ona atagia i le vaega mulimuli o le fuaiupu. O le tuuina atu o le pule, o loo atagia ai le pule na tuuina e le Atua i le tagata e tusa ai ma le tala o i le Kenese 1:28. O le pule o le mea patino i le Atua e tusa ai ma le mau faa-Feagaiga tuai. Ua na o le Atua la e mafai ona tuuina atu ma tuuina ese le pule mai manu feai poo malo faalelalolagi. Le pule lea na tuuina atu i le e pei o le atalii o le tagata (F.14) o le faailoga manino lea o le soloia e le Atua o malo faalelalolagi a e faatu le malo o le au faatuatua. O le fuaitau Aramaika lea o le

בַּר אֲנוֹס (bar- 'enos) ua faa-Samoaina o le 'atalii o le tagata' i le Tusi Paia, e faatatau i soo se tagata. O lona uiga o le pule, o le viiga ma le malo o le a tuuina e le Atua i se tagata na te ta'ita'ia ma o lona malo e le faaumatiaina i le lalolagi. Ua manino lelei i lea vaaiga le mana o le Atua na te pulea ma faamasino ai malo faalelalolagi.

(faaauau itulau 11)

---

# **PEPA FONOTELE MALUA**

## **2019**

### **“O LE ATUA MA MALO FAALELALOLAGI O I LE MATAUPU E FITU O LE TUSI O TANIELU”**

5. *“ua fasimatea le manu feai...A o isi ua aveesea la latou pule...”* (ff. 11-12). O le fuaiupu e 11 ma le 12 o le mataupu e fitu o le Tusi o Tanielu o loo faamatalaina mai ai le iuga o manu feai poo malo faalelalogi. E le o taua foi poo ai lea e faia faatinoga e faapei ona taua. Pau le mea lea e mautinoa, o le iuga o manu feai e fa o le faamasinoga a le Atua. O le fuaiupu e 11 o loo faamatalaina ai le iuga o le manu lona fa. O le manu feai lea e matautia lona tulai mai, o le manu pito sili lea ona leaga pe a faatusatusa ma isi manu e tolu. A o lona iuga foi ua le gata ina fasimateina, a e ua faaumatia foi lona tino ma lafoaiina i le afi. Foliga mai ua matua faaatoatoaina lava ona faatamaiaina lea manu. A o isi manu e tolu ua tuuina ese la latou pule ma faafualoa lo latou ola. Foliga mai e mama le faasalaga o isi manu e tolu. Ua atagia ai le faaogaina o malo faalelalogi e faaalina ai le tuu avanoa o le faamasinoga a le Atua. I lona aotelega la, o le faamasinoga a le Atua ua manino ai le mana o le Silisili’ese. Aua e leai lava se malo faalelalogi e sao mai lana faamasinoga. E faatuina e le Atua malo ma tuuina i ai le pule, peitai a soona fai ma faasausili, o le iuga lava o le lafotuina. O le iuga foi o malo faalelalogi ua faaalina ai foi le alofa o le Atua. E ala lea i le

faatoilaloina o malo na fai ma fili o ona tagata.

6. *“o le malo o le ‘au paia a le Silisili’ese”* (f.18) I le fuaiupu e 18 o le mataupu e fitu o le Tusi o Tanielu, o loo faamatalina ai le faatuina e le Atua o le malo lona lima i le lalolagi. O le ‘au paia e faasino lea ia i latou ua tutumau i le faatuatua. E tusa ai ma le faamalamalamaina o lea malo o i le fuaiupu e 27-28 o le mataupu lava e fitu o Tanielu, o le malo lea o le a tuuina atu i ai le pule atoa ma le mamalu, ma e auauna ma ususita’i i ai isi pule poo isi malo, ma e faavavau foi lona tula’i mai. E foliga mai o le malo o le au faatuatua poo le silisili’ese, o le a tula’i mai i le lalolagi nei, e sili atu lona matautia ma e leai se isi malo e faatusaliaina. Faaalitino lava i le ata o le faatuina o lea malo le mana o le Silisili’ese, o lana Afio lava o iai le pule aoao i mea uma lava.

I lenei autalaga o le mataupu e fitu o le Tusi o Tanielu, ua manino ai le faaogaina e le Atua o malo faalelalogi mo lona faamoemoe, ma faaalitino mai ai ana foafoaga mamana, o lana faamasinoga, o lona alofa, o lana faaolataga ma lona mana silisili’ese. O le mana foafoa o le Atua na faatula’i mai ai malo faalelalogi. O lona alofa na te saunia ai le faaolataga mo i latou ua olopalaina i faiga a malo faalelalogi. O ia faiga faa-le-Atua, ua faaalitino mai ai lona mana

ma lona silisili’ese. Auā o lana lava Afio o i ai le pule aoao e faatonutonu ai le gasologa o malo faalelalogi.

#### **Upu Faaiu:**

Ua faailoa mai i lenei suesuega o le mataupu e fitu o le Tusi o Tanielu, le faaogaina e le Atua o malo faalelalogi e faaali mai ai lona finagalo paia. O se faamanatu taua foi lea mo le Ekalesia ma ona tagata lotu aua o loo aafia pea le Ekalesia i malo ma a latou faiga i lenei foi talutalufou. E ao la i le Ekalesia ona silasila totoa i ia faiga a malo faalelalogi pii le a se feau faa-le-Atua o taumolimoli mai ai. E taua lo tatou manino i le finagalo taumolimoli mai o le Atua e tauala mai i faiga a malo faalelalogi, e tapenaina ai lo tatou lotoifale faa-le-Ekalesia, ma toe fuataina ai la tatou galuega talai i le lalolagi nei; o le faailoaina atu lava lea o le mana o le Silisili’ese o le Atua.

E aoga foi le feau o lenei suesuega mo faigamalo. Auā e iai nisi o lenei Fonotele o mau tofi i lo tatou malo. Ua manino i le sailiiliga le faaogaina e le Atua o malo faalelalogi e fai ma meafaigaluega mo lona faamoemoe. O le valaauina e ao ina faia faa-le-Atua, auā ua tuuina mai le pule ina ia atagia i la tatou faigamalo le mana o le Silisili’ese. Ia ta’ita’iina lenei Fonotele i le mana o le Silisili’ese.

Soifua ma ia manuia

Arthur Wulf (FS)

Faiaoga Kolisi Faafaipeau Malua.

# ITULAU MO TUPULAGA TALAVOU

## ARETO MO LE AGAGA

### O LE MATAUTIA, O LE SEI TOE FAATALI.

I se tasi aso, na telefoni faatopetope ane ai se tinā i le faifeau o le latou aulotu, sei alu atu sei asi lana tane ua matuā ma'i tigaina lava, ua faasolo ina vaivai. Sa alu atu i ai le faifeau, ma ta'u iai le tala i le faaola fai vavega o Iesu Keriso. Sa faamalosi le tamaloa ma tali atu i le faifeau e faapea: "Afai e toe faafoisia mai e le Atua lou malosi, o le a ou lafoai au agasala. E le gata i lena, o le a ou alu atu i le lotu, ma fa'atoese atu i lo'u Alii lo'u Faaola, ma o le a papatisoina a'u."

Na toe faafoi e le Alii i lea tamaloa lona malosi, ma sa le pine ona ia toe maua lona malosi atoatoa. Sa toe afe atu i ai le faifeau i le tasi aso, na ia maua atu o ia o tietie i se ogalaau i fafo o lo latou fale ma fafaga ana moa. Sa faapea atu le faifeau: "Masalo ua e nofo sauni e faataunu'u lau folafolaga i le Alii." Sa tali ane le alii: "Toe, o le a ou faataunu'uina lava lau folafolaga. O le Aso Sa a sau nei o le a ou ulufale ai i le falesa, o le a ou fa'atoese atu ai i le Atua i luma o tagata uma, ma o le a papatisoina ai a'u."

O le mea na tupu, sa le faataunu'uina e le alii lea lana folafolaga. Ua ia le lafoaiina ana agasala, ua ia le fa'atoese foi i lona Faaola, ua le alu atu foi i le falesa. O Afioga a le Atua ua faapea mai: "O le tagata ua a'oa'oina so'o, ae fa'ama'a'a lona ua, e fa'afuasei ona nutimomoia o ia, ae leai se fofu."

E lei mamao nai aso mulimuli ane, ae toe tatagi le telefoni a le faifeau, o le ava a le alii sa ma'i lea ua toe telefoni atu i le faifeau ma faapea atu: "Sau, sau, sau faavave, ua oti lau tane. Sa alu i se aiga fiafia anapo i le fale kalapu. Sa pau faafuasei ifo ai i lalo, ma oti ai. Sa tumu le falelauasiga o lenei tagata i le faanoanoa, auā sa lapataina ma fautuaina o ia, a ua teena pea, ua le fia suia lava ona ala.

Ioe, le matautia lena; **"O LE SE'I TOE FAATALI."**

Tusia:

**Iosefa Atapana Uilelea (FT)  
EFKS Lotofaga.**

### E TELE NAUA LE ALOFA OLE ATUA IA TE OE.

I le maketi i se tasi taeao, ao tumutumu i tagata faatau, sa tulai ane ai se tagata LE TALITONU I LE ATUA, sa alaga leotele e upuvale ma faifai i le Atua. Fai mai lana alaga: "Ia lenei aso, afai e iai se Atua, ia taia nei loa lava 'au i lona malosi ma ou oti ai, ao lei atoa ni minute se tolu." Sa tulai le toe tautala lea alii e pei o

faatallitali atu i se mea. Ua atoa le tolu minute, a ua le afaina lava. Ona toe liliu atu lea ma alaga atu i le motu o tagata i le maketi: "Pei tou te le talitonu ea i le upu na se'i ou fai atu **E LEAISE ATUA?**"

O se tinā matua lava sa latalata ane iai ua fesili ane i lea alii: "Alii e, e iai ea sau fanau?" "Toe, ae aisea ua e fia iloa ai lea mea? Fai mai le

tinā: "Ua lelei, afai e tuu atu e se tasi o lau fanau ia te oe se naifi, ma fai atu – Tamā e, fasioti mai nei ia te a'u, e te faia ea?" Na tali atu ma le ofo le alii. "Aisea, oi e le mafai ou te alofa tele i lau fanau." Fai mai le tinā: "O le mea tonu lava lena na le taia ai oe ia oti e le Atua, **E TELE NAUNA LONA ALOFA IA TE OE,**

Saunia:

**Iosefa Atapana Uilelea (FT)  
EFKS Lotofaga**

# O E UA FAI'ILAGI LE FOLAUGA

## AUALIITIA TO'I AUALIITIA

10 Iuni 1957 - 12 Fepuari 2019

O le afioga ia Aualiitia To'i o se tiakono o le Ekalesia EFKS-Ola mo Keriso i San Diego USA. Na soifua mai Aualiitia i le aso 10 Iuni 1957, i le nuu o Leauvaa, Samoa, ae maliu i le Aso 12 Fepuari 2019. O ona matua o Sagote Afele (tamā) ma Lila Aualiitia (tinā). E to'alima ona tuafafine ma ona uso e to'alima. E to'atasi lona afafine na tausi o Michellene ma lona grand-daughter o Gemini. Sa a'oa'oina To'i i le a'oga a le Faifeau ia Sili Perelini FT male Faletua ia Malaea, atoa ai ma le Kolisi o Samoa, ona faigaluega lea i le Ofisa Fuafanua mo le 2 tausaga ae lei malaga mai i Amerika nei.

Sa faataunuu mai i San Diego (1979) ma nofo ai i lona uso o Tuilaepa L Lagoga ma lona tausi ia Elisapeta. I le tausaga e 2004 na faapaia ai lona tofi tiakono i le tofiga a le Matagaluega. O lona soifua galue i totonu o le Ekalesia e toafilemu ma tau le lagona lona leo. E le gaoia lona alofa ae olo lava le fua ma tautua gugū e leai se leo. E fiafia e foa'i ana tupe i le galuega a le ekalesia. E alofa foi ile faifeau ma lona to'alua, faapea lona aiga (uso & tuafafine ma a latou fanau).

O lona gasegase e lei umi o faataotolia i le falema'i ae maliu. Ua leva ona silafia e To'i le tulaga faigata o lona gasegase, peita'i sa faale manatu tele i ai. Ae a'oa'o mai lona gasegase mo i latou e iloa o ia i le taua o le tausi lelei o le soifua maloloina ma usita'i i fautuaga a Foma'i.

O le aso Faraile 1 Mati, 2019 na faia ai lona sauniga faaleaiga (family service-community Mortuary, Chula Vista, Ca) i le afiafi. O a'u sa ta'ita'i ma saunia le upu faamafanafana, ae saunia e le A'oa'o Fesoasoani ia Tanu Tootoo talosaga ma faitau le Tusi Paia. Sa molimau i lea sauniga le tofā ia Tuilaepa Lafoaga ma nisi o tuafafine ma uso o To'i faapea ana

uo. O le sauniga mulimuli o le tiakono i le aso Toonai 2 Mati, sa ou ta'ita'iina lea foi sauniga, ma sa auai le Pulega i Saute. O le susuga i le faifeau ia Filo Tauaivale (FS) na saunia le lauga. Sa tatalo le faifeau o Benson Mauga (Ekalesia Nasareta), faitau le Tusi Paia e le A'oa'o ia Tanu Tootoo AF. Sa molimau le tamaita'i ia Michellene i lona tamā, o le afioga ia Muagututia Tuala sa fai ma sui o le aiga, ona faaiu ai lea i le molimau a le faifeau. O a'u sa ta'ita'i i le sauniga i le tuugamau, ona matou faamavae atu ai lea i le tiakono i le pese a le au faatuatua..."Talofa uso e, tofāina oe...tofā...tofā To'i. Manuia lau malaga.

**Saunia:**

**Makerusa Porotesano (FT)  
EFKS – Ola mo Keriso  
San Diego USA.**

## REV. AREKASETA SULA MALAGA(FS)

16 Fepuari 1953 - 25 Mati 2017

O le susuga i le faifeau o Arekasetta Sula Malaga na soifua mai i lona aiga i Falefa Anoama'a ae na fa'amanavaina e lona matai ana galuega ao galue o se faifeau nofoaiga i le EFKS Ketesemane Porirua Niu Sila i le aso 25 Mati, 2017 i Ueligitone Niu Sila.

Sa faaipoipo atu ia Silafaga Faalagilagi Apisaloma i le tausaga

1980, e to'a ono o la alo, e lua alii ma tama'ita'i e to'afa.

O lona soifua a'oa'oina, sa a'oa'oina i le a'oga tulagalua i Falefa 1964 – 1966 soso'o ai ma le a'oga i Leififi Intermediate 1967 – 1968. O le 1969 – 1972 na a'oa'oina ai i le Kolisi o Avele. O le 1973 – 1974 sa a'oa'oina ai i le a'oga a le Iunivesite o le Pasefika i Alafua, soso'o ai ma le Iunivesite o le Pasefika i Fiti i le 1975 – 1976.

Na ulufale i le Kolisi Faafaifeau i Malua i le 1991 ma lona faletua ia Silafaga ma le nofo a alo ma

# O E UA FAI'ILAGI LE FOLAUGA

## REV. AREKASETA SULA MALAGA (FS)

16 Fepuari 1953 - 25 Mati 2017

fa'ai'uina le taumafai i le 1994. Sa avea ma Peresetene o le Kolisi i lea lava tausaga.

O lona soifua galue, sa avea ma Pule o le Fa'atoaga a le Malo i Togitoniga i le tausaga 1979 – 1981. I le 1984 – 1990 avea ma Ofisa Sinia i le Faletupe o Atina'e a le Malo Samoa.

Ina ua faaiuina lo la taumafai i le Kolisi Faafaifeau i Malua, sa valaauina loa e le EFKS Sapunaoga Falealili e fai ma o latou faifeau i le tausaga 1996 – 2002. Sa avea foi ma sui faifeau o le Matagauega Falealili i nisi o Komiti a le Ekalesia, pei o le Komiti Atina'e.

I le tausaga 2011 – 2015 sa avea ai ma faifeau i le EFKS Fusi Saoluafata. Na valaau le Atua i si ona faletua o Silafaga Faalagilagi i le 2014 ao galulue ai i le EFKS Fusi Saoluafata. Na tuua le galuega i Fusi ina ua maliu si ona faletua, ma malaga mai ai i Niu Sila ma matou galulue ai i le 2016 se ia oo ina faamanavaina e le Atua ana galuega i le aso 25 Mati, 2017.

O lona sauniga faaleaiga sa ta'ita'i le susuga i le toeaina ia Faatauoloa Mauaiva (FT) (Faifeau EFKS

Falefa). O le susuga faifeau o Vaimoso Apineru (FS) sa tatalo, o le Tusi Paia sa fofogaina ele Susuga Mose Malaga (FS) (o se tasi o ona alo ua avea ma faafeagaiga i le EFKS Salailua). O le susuga i le Faifeau ia Peniamina Leota (FS), sa saunia le upu faamafanafana, sa molimau fanau aiga uo ma e masani.

O ona toe suaniga, sa ta'ita'i le susuga i le toeaina o le Pulega a Ueligitone i Matu, Susuga ia Aufaga Faafia (FT). O le lauga na saunia e le susuga Nove Vailaau (FS), Talosaga na saunia lava ele Ta'ita'i. Sa molimau le susuga Mose S. Malaga (FS) Sui o le fanau, o le susuga toeaina ia Faatauoloa Mauaiva (FT) (Faafeagaiga EFKS Falefa) sa molimau mo le soifua faaleagaga o le faifeau o le sa tautua ma auauna i le tele o tausaga i le EFKS

## TAIMAIONO ESENE ETOA EDDIE BAKER

6 Aokuso 1940 - 27 Iuni 2017

Na soifua mai Taimaiono Esene Etoa Baker i le 6 o Aokuso, 1940, ae na valaauina e lona matai i le 27 Iuni, 2017 i lona aiga i Porirua Ueligitone Niu sila. Ua atoa ai le 76 tausaga 10 masina ma aso 11 o lona soifua.

Falefa. Sa ou molimau e tusa foi ma taimi o la matou mafutaga. Auā o le soifua a'oa'oina ma le soifua galue o le susuga faifeau ia Sula Malaga, o loo fa'aalia o ia lava o se auauna na ofo atoa le soifua i le Atua ma lana galuega. O lea lava ua molimauina i se tasi o ona alo ua ia fa'aauau le la galuega male tinā. O se auauna faamaoni finau mo mea lelei, e fiafia e galue i totonu o le lotu e faamoemoe iai i lana tofa faafaifeau o se fesoasoani i le galuega.

Sa ou ta'ita'i lona toe sauniga i lona oliolisaga tumau i Papatoetoe, Manukau Aukilani ma faamavae atu i le pese a le Aukerisiano – Tofā, Tofāina le susuga i le faifeau – Arekasete Sula Malaga.

O la le fai salamo... “E silisili i le manatu o le Alii le oti o ona tagata amio Atua”.

Manuia lau malaga Sula Malaga.

Saunia: **Kuatemane Ulutui (FS)**  
**EFKS Ketesemane**  
**Porirua, Ueligitone**  
**Niu Sila**

Sa faaipoipo atu ia To'atolualii Maria i le aso 19 Novema, 1967. E to'asefulutasi (11) o la alo, e to'alima alii ma tama'ita'i e to'aono. O fanau a la fanau e to'atolusefululima(35) O fanau a fanau a lana fanau e to'a sefuluvalu (18). E 64 ē ua tupuga mai le tamā i le taimi na valaau ai lona matai ia te ia.

O ia o se tasi o tiakono matua o lenei aulotu. Sa faatiakonoina i le

# O E UA FAI'ILAGI LE FOLAUGA

## **TAIMAAIONO ESENE ETOA EDDIE BAKER**

1985 e le susuga ia Popo Su'a (FT). O se tasi o toe ulutaia o lenei Ekalesia sa latou amataina ma faavae lenei aulotu i le amataga e o'o mai i le aso.

Sa ou ta'ita'i i lona sauniga faaleaiga ma ou faaopoopo i le upu faamafanafana, Susuga aoa o Iopu Tagatauli sa Faitauina le Tusi Paia ma sauni le upu faamafanafana, sa molimau le fanau, aiga, uo ma e masani. O lona toe sauniga sa ta'ita'i le toeaina o le Pulega Ueligitone i Matu, Susuga Aufaga Faafia (FT) sa ia saunia talosaga. Susuga Nove Vailaau (FS) sa saunia le upu faamafanafana na fofogaina afioga paia a le Atua. Sa molimau le tinā ia To'atolualii Maria i le mafutaga, faapea foi le sui o le

fanau. Sa ou molimau i lona soifua faaleagaga.

Sa molimauina o Taimaiono o se auaua faamaoni i ona tofiga ma lona valaauina. O se tamā e fiafia i sauniga Lotu, e agamalu ma loto maulalo, e to'afilemu, e le sii. E le lagona se leo, ae leo tele a latou galuega.

Sa ou faai'uina ona sauniga i lona oliolisaga tumau i Whenua Tapu, Porirua. Ma faamavae atu i lea auaua e pei ona fetalai le Alii, le auaua lelei e, ma le faamaoni ulufale maia i le fiafia o lou alii. O le pese a le au kerisiano – tofa tofaina o Taimaiono Esene Etoa Eddie Baker. Manuia lau malaga.

Saunia: **Kuatemane Ulutui (FS)  
EFKS Ketesemane  
Porirua Ueligitone  
Niu Sila.**

\*\*\*\*\*

## **SALAMINA TALOAILONO TUSA**

27 IULAI 1939 - 6 IULAI 2017

O Salamina o le faletua o le tiakono. Na soifua mai i lona aiga i Tafitoala, Safata i le aso 27 Iulai 1939. Na fa'amanavaina ana galuega e lona matai i le aso 6 Iulai 2017. Ua atoa iai le 77 tausaga,

11 masina ma aso 21 o lona soifua.

Sa faaipoipo atu i le tamā ia Fiu Nofoaiga Tusa o Faleseela Lefaga. E to'a 7 o la alo. E to'atasi le teine ma tama e to'aono. E to'atolu le la fanau fai.

O lona alo matua ua fa'ai'uina mai le taumafai i le Kolisi Faafaifeau i Malua. O molimau ola ia o le tinā ofo atu le fanau i le Atua ma lana

galuega o ata o se tinā lelei. O se tinā e molimauina lona fiafia ma naunau i galuega ma mea fai a le lotu, o A'oga Aso Sa, Aufaipese Mafutaga tinā, ae lei aafia o ia i gasegase faigata, ua le toe lava ai sona malosie auai i le tele o galuega sa fai ma mea fiafia ia te ia i le lotu. O Salamina, ose tinā e tumu i le faaaloalo ma loto mauualalo, ai ona o ia o se tasi o teine tuai o le papa. E amio solia ma tausaaafia e iloa i lana gagana ma lona sagisagi mai. O ia o se faia'oga fa'au'uina o le malo o Samoa.

Sa ou ta'ita'i i lona sauniga fa'aleaiga sa lauga le susuga toeaina ia Aufaga Faafia (FT). O le a'oa'o Iopu Tagatauli (AF) sa fofogaina le Tusi Paia. Sa ou tatalo, ma molimau sa saunia e le fanau, aiga, uso, tuagane ma e masani.

O lona toe sauniga sa ta'ita'i susuga toeaina o le Pulega Ueligitone Matu, Susuga Aufaga Faafia (FT). O Nove Vailaau (FS) sa saunia le lauga. Sa ou molimau i lona soifua faaleagaga. Sa molimau le Susuga A'oa'o, Onosai Tusa e fai ma sui o le fanau faapea le aiga.

Sa faaiuina ona sauniga i lona oliolisaga tumau i Whenua Tapu Porirua ma faamavae atu i le tinā pele i le Pese a le Au kerisiano. Tofa, tofaina Salamina Fiu Nofoaiga Tusa.


Manuia lau malaga.

Saunia: **Kuatemane Ulutui (FS)  
EFKS Ketesemane  
Porirua, Ueligitone  
Niu Sila**




---


# O E UA FAI'ILAGI LE FOLAUGA




**SALAMINA  
TALOAILLEONO  
TUSA**



**REV.  
AREKASETA  
SULA  
MALAGA(FS)**



**TAIMAIONO ESENE  
ETOA EDDIE BAKER**



**AUALIITIA TO'I  
AUALIITIA**

---

O le ata o loo le pito i lalo o le Susuga i le Toeaina Penisione Malolo ia Tautiaga Senara (FT) ma le Faletua ia Olita Senara, ma le Susuga ia Nuuausala Siaosi Siutaia ma le faletua sa auai e molimauina le aso fiafia o i latou

ua penisione malolo mai le talaaina ma le tautuaina o le finagalo o le Alii i nuu ma ekalesia . Malo le onosai malo le tautua i le Atua ma lona finagalo. "Ia pau se toa a ia tu se toa."

